



ՀՈԳԵԼԻՑ ՊԱՀԵՐ ՍՈՒՐԲ ԷԶՄԻԱԾՆՈՒՄ

23 հուլիս 1995:

Տօն Պաշտականության Տեառն մերոյ Յիսուսի Քրիստոսի:

Վարդավառ...

Եկեղեցական օրացույցում գրանցված տոնացուցային այս պարզ ու անպանույճ բառերը Տիրոջ աստվածային փառքի հայտնության վեհասքանչ որվագի պանծացումից բացի հոգեկորոգության ու վերածննդի խորհուրդ հազան **Մայր Աթոռի ճեմարանավարտ չորս սարկավագների** համար, որոնք այդ օրը ծնկի եկան Ս. Սեդանի առջև և ուխտեցին անսալթաք նվիրումով ծառայել Ս. Էջմիածնին ու Հայ Եկեղեցուն:

Այդ օրը վերալիցքավորման ու ներշնչանքի անսպառ աղբյուր դարձավ նաև այն բազմահարյուր հավատացյալ հայորդիների համար, որոնք խոսնեքամ բազմությամբ լցրել էին Մայր տաճարը, և որոնցից շատերի համար անակնկալ էր չորս երիտասարդների հիրավի պաշտականությունն ու աշակերպությունը՝ նմանողությամբ իրենց Երկնավոր Վարդապետի:

Այդ օրը նաև հավերժորեն գրանցում ստացավ Մայր Աթոռի հազարամյա պատմության մեջ, քանզի նորընտիր Ամենայն Հայոց Կաթողիկոս Ն. Ս. Օ. Տ. Տ. Գարեգին Ա Հայրապետը անձամբ կատարեց քահանայական ձեռնադրությունն ու օծումը չորս նվիրյալ ընծայացունների՝ որպես առաջին գրված էջերից մեկը իր գահակալության:

* * *

Քահանայական ձեռնադրության և օծման հոգեպարար արարողությունն սկսվեց քահանայական կոչման հանդիսավոր կարգով, որը տեղի ունեցավ շաբաթ երեկոյան, 22 հուլիսին, Իջման Ս. Սեդանի առջև, որտեղ **Գեղամ սարկավագ Տիգրանյանը, Վազգեն սարկավագ Գալստյանը, Վարդան սարկավագ Հարությունյանը և Գարեգին սարկավագ Աղաբաբյանը**, ի ներկայության միաբանության և հավատացյալ ժողովրդի, միահամուռ հաստատվեցին ու վկայվեցին Հայ Եկեղեցու ուղղափառ դավանանքի մեջ և իրենց պատրաստակամությունը հայտնեցին ընդունելու քահանայական պաշտոնի ու պարտականության ծանր լուծը:

Հաջորդ օրը, կիրակի, 23 հուլիսին, հրնթացս ա. պատարագի, տեղի ունեցավ վկայյալ և ի քահանայություն կոչեցյալ սարկավագների քահանա-

յական ձեռնադրության և օծման արքայական արարողությունը: Պատարագիչն էր Ս. Ներսես արքեպիսկոպոս Պոզապալյանը, խարտավիլակը՝ Ս. Հուսիկ արքեպիսկոպոս Սանթուրյանը: Ձեռնադրությունն ու օծումը կատարեց Ն. Ս. Օ. Ս. Տ. Գարեգին Ա Հայրապետը:

Ընծալիները ծնկաշոք բարձրացան Ա. Խորան և, ձեռքերը բարձրացնելով, հրաժարվեցին աշխարհից և նրա սին ու դատարկ հրապույրներից: «**Ես ձեռս դնեմ ի վերայ սոցա եւ դուք ամենեքեան աղօթս արարէք**»՝ ձեռնադրության արքայական պահն է, և Վեհափառ Հայրապետի ձեռքերով Հայ Եկեղեցու բոլոր հայրապետներն են, որ ձեռնադրում են նվիրյալներին:

Ապա ս. պատարագը շարունակվում է մինչև «Ողջոյն»: Սկսվում է օծման կարգը: Վեհափառ Հայրապետը արքայույս մյուռոնով օծում է նորընծաների ճակատներն ու ձեռքերը և նրանց վերանվանում նոր անուններով: Գեղամ սարկավագը վերանվանվում է Ս. ԱՐՏԱԿ քահանա, Վազգեն սարկավագը՝ Ս. ԲԱԳՐԱՏ քահանա, Վարդան սարկավագը՝ Ս. ԿԱՐԱՊԵՏ քահանա, և Գարեգին սարկավագը՝ Ս. ԳՈՒՐԳԵՆ քահանա: Հին մարդու մահն ու նոր մարդու ծնունդը խորհրդանշող այս գեղեցիկ արարողությունն ավարտվում է նորընծա քահանա Հայրերի տված անդրանիկ օրհնությամբ՝ «խաղաղութիւն ամենեցուն»...: Ի՞նչ թարմ ու քաղցր են հնչում այս բառերը, որոնք առաջին անգամ արտաբերվում են նորած քահանաների շրթներից...:

Օծումից հետո Վեհափառ Հայրապետը իր պատգամն է տալիս նորընծաներին. «Այսօր Ա. Էջմիածինը վերածնվեց ձեր մեջ, և ձեր միջից պետք է ճառագի ու թափանցի բոլոր հայու զավակների մեջ», ասում է նա:

Ա. պատարագից հետո հսկայածավալ բազմությունը մեկ առ մեկ մոտենում և համբուրում է ձեռնադրյալ և օծյալ Հայրերի մյուռոնաբույր սուրբ աջերը:

* * *

Երեկոյան ժամերգությունից հետո, Վեհափառ Հայրապետը կատարում է **վեղարի տվչության կարգը**: Հոգեւորոգ աղոթքների ընթերցումից հետո Ս. Արտակ, Ս. Բագրատ, Ս. Կարապետ և Ս. Գուրգեն աբեղաների գլուխները ծածկվում են կուսակրոնության խորհրդանիշ արարատանման վեղարներով:

Թող Աստված իրենց ուխտի մեջ հաստատուն պահի Մայր Աթոռի նորընծա չորս միաբաններին, որպեսզի նրանք լինեն «մշակք առանց ամօթոյ» և ծաղկուն պահեն Աստուծո կողմից իրենց վստահված անդաստանը: Թող այսպես ալիք առ ալիք Ա. Աթոռից երիտասարդ «անձինք նուիրեալք» ընծայվեն մեր ժողովրդի կյանքի ազգաստանների հոգևոր մշակության սուրբ առաքելությանը, մանավանդ Մայր Հայրենիքի և վերանկախացյալ Հայաստանի Հանրապետության այս լուսավոր շրջանում:

ՎԵՀԱՓԱՌ ՀԱՅՐԱՊԵՏԻ ՕՐՀՆՈՒԹՅՈՒՆԸ ՆՈՐԸՆԾԱՆԵՐԻՆ

Հաճութեամբ ընդունիր, Տէր, ուխտը այս չորս երիտասարդներին, **Վազգէն, Վարդան, Գարեգին** եւ **Գեղամ** բարեշնորհ սարկաւագներին՝ որոնք իրենց անձերն ու կեանքներն են ընծայում Քեզ, Քո սուրբ Եկեղեցուն եւ Քո Աւետարանի սրբարար ճշմարտութիւնների քարոզութեանը:

Քահանայական ձեռնադրութեան ու օծման եւ արեղայական կարգի ստացման այս շնորհալի օրուայ մէջ, երբ մեր Հայաստանեայց Առաքելական Ս. Եկեղեցին վերապրեցնում եւ պանծացնում է մեր Տիրոջ եւ Փրկչին՝ Յիսուսի Քրիստոսի կեանքի պայծառակերպութեան լուսեղէն դրուագը, պարգևիր այս երիտասարդներին Ս. Հոգու շնորհները եւ սփոիր նրանց եւ մեր՝ հաւատացեալներին մէջ Քո Լոյսը ամենացոյց եւ կենսաշաւիղ:

Պայծառ պահիր Մայր Աթոռ Ս. Էջմիածինը եւ օրհնիր նրա ուխտանուէր Միաբանութիւնը, ըստ բանի Քում. «Հունձք բազում են եւ մշակք՝ սակաւ. աղաչեցէք զՏէր հնձոց, զի հանցէ մշակս ի հունձս իւր» (ՄԱՏԹ. Թ 37—38):

